



Sabtu, 23 Desember 2023
Ogen: 1 Samuel 1:24-28



Kuendesken Diriku Man Tuhan



Nehken persembahen e me sada biak i bas kalak si tek, tanda ras pengakunna maka kai si lit i bas ia e rehna i bas Dibata nari. Alu kata sideban, banci saja si ipersembahkenna bentuk barang, duit, waktu ras sidebanna tapi situhuna totalitas geluhna me siipersembahkenna e. Kula tendi ukur seh maka kerina si lit i bas kita si gejab bekas perkuah ate Dibata teptep paksa kegeluhenta.

Bage me Hanna nggejabken i bas perdalanan geluhna, la ia lupa padan sipernah ibelaskenna man Tuhan. Paksa si lepas sanga ia tertima-tima tuah ku bas jabuna, ertoto ia alu mengisngis ku Dibata. Ialoi Dibata pertotonna, tubuh me anak ku tengah jabuna. E maka kenca enggo ialokenna, isehina padanna e alu ngendesken anak pemere Dibata man Dibata mulihken. Iendeskenna ku rumah pertoton i Silo, i je me anakna Samuel nggeluh reh belinna, la terpengaruh kegeluhen anak-anak imam Eli janah kedungenna jadi iman me ia.

Persembahen si mehuli reh i bas ukur si mbages, sura-sura si igenepi, isehi janah teklah ulihna pasti si mehuli la saja man simpersembahkenca tapi pe man kalak sideban terlebih-lebih man Dibata. Rikutken si enda, i bas kita ernatal tahun 2023 enda, kai nge persembahen si mehulina si enggo si endesken man Tuhan? Tentuna arus si jadi persembahen ras pengakunta e me ngendesken dirita, geluhta alu bage kai pe silakoken ras sibaba kita i bas natal tahun enda tuhu-tuhu reh i bas pusuh si bersih nari. Janah ngena ras meriah min ukur Dibata arah kai silakoken kita. Amin, i bas prosesna enda mbelin perbeben nta pe kiniseran si man bentasen, si man alanken tapi la ngkurangi sura-sura. La saja dirinta tapi pe ngajuk, njemba anak jabuta, kalak sideban guna ngendesken dirina man Tuhan. Alu usihen si enggo sibereken.

🔍 Sirenungken, enggo nge siendesken dirinta man Dibata?